

Xku'n stsi'lña minn boka

Boka xigian minn una' chap tsi'ptib tsi'pchop is. Nika dzedi'dzda minndo' ichop xkomier, sinda pxoz xna' minndo' dzedi'dz.

Or lè' pxoz xna' mgiy xia xinab una', ndal niy minn xia minn. Or xia minn tib niy minn, lè' minn chey gias gana mezkal. Ga dzekna lè' minn xnabdi'dz gan be chut zëxda dzinab minndo' una' knu.

Ga dzekna dela chut zëxda dzinab minndo', lè' pxoz xna' minndo' pgiy xnab una' knu ika' xìn.



Ga lè' pxoz xna' minndo' una' xne' lo
minn:

—Be zi'dtá stib, lè'nu izedi'dzña xinnu.

Xded stib xman tsi'n mbidz, lè' pxoz xna'
mgiy xia stib gan be nak di'dz be skëb minndo'
una', ga lè' minn cheyaga mezkal gana gias. Ga
dzekna lè' pxoz xna' minndo' una' xnab tsa
minndo' pgiy gan be nli minndo' pgiy uxa'l
pxoz xna' zigian una' knu.



Gu'n tson lë' minndo' pgiy xia iza pxoz
xna' ga dzekna lë' di'dz xli.

Lë' pxoz xna' minndo' una' xne' lo
minndo' pgiy zakla tsa minndo' pgiy zu chow
yu dzekna lë' minn gwiyla lë' xti'dz minndo'
yula. Gana lë' minndo' pgiy xiala chu'nn yud
xiwzan xia gon, xia dën gana xia uyag.



Lë' gu'n tap, lë' minndo' dzedi'dzla. Lë' minn cheyla nup komid sdza'l giat xia lo una'. Ga dzekna lë' mgiy xde'd tib rser lo una'. Or xielo xkaña una' rser, lë' minn xkaña komid.

Lë' gu'n ga'y lë' minn lidz mgiy dzinnkëla chey komid. Gu'n chey minn nak: chop mech, ga'y docen ngow, gana lë' minn chey tib medid mezkal, gech, yag gana panel lo gunuta yu tiemb.



Ga dzekna xded stib schop më', lë'
minndo' stsi'lña. Or knu tsi'nta is chapzë
minndo' lë' minndo' stsi'lñala.

Dze stsi'lña minndo' lë' pxoz xna' mgiy
xia' chixi minndo' una' szinn lidz mgiy, gana
szinkëkga pxoz xna' una' szinn lidz mgiy. Ga
dzekna lë' minndo' chok xab ichop.

Lach gu'n chok minn or lë' minn stsi'lña
nak lach gu'n xdi'b. Xdi'b now niy chok una',
xkë kamaron niy di't xgi'd xibu, gana axta niy
xkë kamaron.



Xkakga chuxkwa' blus, lè' blus nak blus puert cho'b lach yan nak redond, gana xdi'b refaj xiu lèn now, xdi'b kamisna xiu lèn blusna.

Gik una' sdzob listón xia'g las. Gana xbix una' bay ya's.

Lè' mgiyna xdi'b lach mand chok or knu lè' minn xne' lèwu kalson mand. Xkè chop blè lach lo xitsu. Gana xdi'b bia'g, lach ray xdi'b xibiag mgiy.

Lè' mgiy xcho'b panit yan. Niy mgiy xkè gilgid. Yu minn stsi'lña mè'l niy, giend gu'n ikè niy.



Or lè' minndo' xielo chok xab, lè' xnambal minndo' xli'b gik una'. Xlox chuxkwa' minndo', lè' minndo' sia ido' itsi'lña. Nonga gi'b xkë, xka dzekna lè' minn nan lè' mis gak itsi'lña minndo'.

Or knu dzega dzega xcha' minndo' sia minndo' ichë minndo' minn lidz sdzinn ido'.

Or knu giend laso, sinda no'nda du' xi'l xiu yan minn stsi'lña. Gana xcho'b bay ido' yan minn.



Loxna xiu rser du' xi'l yan minn. Lo rserna
mgij kë krus, lë' lo xirser una' kë nay ba' lo.
Minn chak mbal xia xits minn stsi'lña nak
xnambal gana pxozmbal mgij.

Mbal sdzën minndo' pgij xcho'bnis, mbal
knuga xia xits minndo' or lë' minndo' xka' mdo
gana or lë' minndo' xkebey. Gana mbal knukga
xia xits minndo' or lë' minndo' stsi'lña. Dela lë'
minndo' pgij chapda mbal, ga lë' xnambal
pxozmbal una' xia xits minndo' lë' minndo'
stsi'lña.



Or xlox misna lë' minndo' siakga lidz
mgiy. Lidz mgiy szzinn minn lë' minn chowzë.

Gu'n chow minn nak kald ngon gana yuga
minn chap ngid, lë' minn knu chuxkwa'ga kald
ngid. Nonga gu'n xiu lo kald nak kwlandr,
ption gana midzangngid. Yuga minn chuxkwa'
nup xo'b ngidna. Gana gu'n cha minn lo lni nak
nip ichop mezkal.

Xlox wag lë' minn chuslo xkë' di kon
biolin. Biolin xkë di lë' minn utsi'lña cho'l gana
lë' ichë minn lidz cho'lzë. Chop mbidz xkë di
lidz minn utsi'lña.



Dze primer chuxkwa' ark xiley mgiy, pxil xkë gia' lëd chuxkwa' ark. Gia' punt xkë' minn lëd ark sdza'l gia' jaran gana gia' lbë. Ga lë' mgiy dzënsiña ichop una' cho'l xan ark. Nonga minn utsi'lña cho'l xan ark sande lë' ichë' minn xkisa cho'l.

Lë' dze uchop xkëkaga di, ga lë' ichëka minn cho'l. Gana lë' minn dza' dëw.

Lë' minn utsi'lña cho'l lën dëw ichë mbal. Dëw nak or lë' minn sdzënsiñazë, xkwa' gagu minn utsi'lña. Lë' minn utsi'lña cho'l lën dëw. Dëw chuxkwa' cho'l minn lën dzekna wen iban minn.



Boka xgadta minn lo minn stsi'lña, sinda lè' minn xizu lo xna' mgiy pxoz mgiy. Gu'n chey minn xizu minn lo pxoz xna' mgiy nak xob, pza', panel, dia kafe, mezkal gana gias.

Lè' or lè' lni xloxla lè' minn uyak mbal sdzinn sdziña minndo' sdzinn lidz, ga xiu minndo' tsi'n mbidz. Xia' tsi'n mbidz lè' minn xisa'n minndo' ido'. Ga lè' mbal xiñaka minndo' lidz mgiy gala dzekna nak di't xiu minndo'.



Boka xka stsi'lña minndo' sa'nda nana
x̣a'la chak or lë' minndo' stsi'lña gana lo na
minndo'la xwiy gan chu ika' sa'nda boka
minngol xgib minn ika' x̣in.